

四庫全書

子部

欽定四庫全書

子部

古今事文類聚新集卷十八

詳校官中書

臣孫衡

侍讀

臣孫球覆勘

總校官編修

臣

王燕緒

校對官中書

臣

王家賓

膳錄監生

臣

范鐘

欽定四庫全書

古今事文類聚新集卷十八

元 富大用 撰

御史臺部

御史

歷代沿革御史之名周官有之戰國亦有秦趙渑池之
會各命書其事則皆記事之職至秦漢為糾察之任
所居之署漢謂之御史臺亦謂之蘭臺寺

漢以尚書
為中臺御

史為憲臺謁者為外臺謂之三臺

梁及後魏北齊謂之南臺北齊御

史臺掌察糾彈劾後周曰司憲唐曰御史臺高宗龍朔中改為憲臺武后時改為肅政臺後去肅政之名但為左右御史臺宋沿唐制設御史臺其屬有三院一曰臺院侍御史隸焉二曰殿院殿中侍御史隸焉三曰察院監察御史隸焉御制三院多出外任風憲之職用他官領之太平興國三年以張巽為監察御史正名舉職自此始也唐制御史不專言職至天禧

中始置言事御史唐朝有御史裏行至景祐中始置以

處御史之官卑者唐儀臺案有六監司元豐三年李定

請復六察於是以御史專領六察

元豐三年御史臺言請以吏部及審官東

西院二班院隸吏察戶部三司及司農寺隸戶察刑部大理寺審刑院隸刑察兵部武學隸兵察禮祠部太常

寺隸禮察少府將作等隸工察從之元御史臺掌糾察朝儀彈劾官邪勘

鞠官府公事凡內外刑獄所屬理斷不當有陳訴者付

臺治之登聞檢院隸焉有御史大夫御史中丞其下有

侍御史治書御史各二人又有殿中侍御史二人又有監

察御史及典事之官其屬有架閣庫管勾檢法獄丞等職

羣書要語御史掌邦國都鄙及萬民之治令以贊冢宰

掌贊書

禮春官

栢寺圖書之府蘭臺章奏之庭踰鮑宣之

再入類胡廣之三登薛宣之明習文法周處之震肅權

豪

晏公類要

烏臺峻秩望總鐵冠蒼佩崇班威高石室朱帷

霧徹初停州縣之勞白簡霜飛宜屏權豪之氣

唐中宗授蘇烟

制中朝執憲之司四海繩違之地凡居中外皆候整齊

五代會要

憲官之職在指佞觸邪

唐太

和勅執簡南憲是惟邦直

李四制事總朝綱職司天憲五代會要霜威掃地風憲收聲同上

執憲準繩之司所以提振紀綱端肅內外白集行薛御存誠制

史府自中執憲暨察視之官皆顯秩也白集總憲度於朝

端植風聲於天下柳文秦漢以降御史府莫不用剛果勁

正之士維持紀綱季代而還埋輪破柱之徒絕不復出

元微之行裴注制前代有埋輪都亭之奏唐朝有戴豸正殿之

劾杜牧行李蔚制謬掌天憲同上御史府不以一職名蓋總察羣

司典掌衆政元微之行高允恭制察糾彈劾北史舉直錯枉不避親

金匱要略卷之八
讎糾慝繩違務從公正

云云

寄之鷹隼用屏豺狼

唐大以詔令

掌刑法典章糾正台官之罪

唐百官志

臨制百官糾繩不法

若事簡則風憲自肅事煩則紀綱轉輕

唐會要

彰善癉惡

激濁揚清御史職也

唐大詔令

大事奏裁小事專達

唐百官制熒

惑火之精御史之象主禁令刑罰收捕糾正

詩句迴迴迹清憲臺

選贈王元貺

盛府持清索殊章動繡衣風

連臺閣起霜就簡花飛

蘓味道贈御史入臺

稜稜直指烈烈方書

蒼玉鳴佩繡衣登車

元希聲四言詩

烏府先生鐵作肝霜風卷

地不知寒

東坡贈劉顥
言事貶官

老持臺憲減霜稜

林通

栢臺霜氣

夜淒淒風動琅璫月向低

東坡

擊彊如摧枯食藥不知苦

山谷

御史霜降威行私不容粟

同上

白簡威猶凜青山興已

濃

東坡

時來上青冥俛仰但一節危言回丘山聲利盡毫

末

荆公送孫叔
康赴御史府

古今事實

烏府

前漢御史府井舍百餘區府中列栢樹常有野烏數千

棲止朝去夕來

朱博傳

又成帝時御史臺有烏集故謂之

烏臺

蘭臺

御史臺率執憲中司朝會獨坐內掌蘭臺督諸州刺史

漢官儀

又在殿中蘭臺掌圖籍秘書

前漢百官志

又曰栢臺

見烏

府注

又曰南臺

見弘革注

陳子昂為陳舍人讓官表云執憲南

臺又曰肅政臺

見弘革注

準繩之司

唐高宗問羣臣舉御史僉舉萬年尉楊子帝曰斯人常
褻服居公視事其可以為準繩司乎

紀綱之地

唐大中三年中丞魏謩兼判戶部謩奏曰御史臺紀綱
之地不宜與泉貨吏雜處乞罷綜戶部事從之會要又曰

御史臺朝廷綱紀綱紀正則朝廷理朝廷理則天下治

魏謩
傳

謂之三司

凡寃而無告者三司詰之大事奏裁小事專達三司謂

御史大夫中書門下也

唐百官志

又高宗武后之際當時大

獄以尚書刑部御史臺大理寺雜案謂之三司

六典

號為七貴

御史故事大朝會則監察押班常參則殿中知班入閣
則侍御監奏含元殿最遠用八品宣政殿其次用七品
紫宸殿最近用六品殿中得立五花塼綠衣用紫按褥
之類號為七貴

唐國史補

謂之八印

臺印隨從印左巡印右巡印監倉印監庫印監察印出

使印謂之八印

唐臺義

謂之三告

宋朝在禁中唯三官得告宰相告于中書翰林學士告

於本院御史告于朝堂皆用朱衣吏謂之三告官

會要

雄要可稱

貞觀初以法理天下尤重憲官故御史稱為雄要

通典

雄峻莫比

御史為風霜之任彈糾不法百寮震恐官之雄峻莫之

比焉

同上

臺置六察

御史臺大夫一人中丞三人掌以刑法典章糾正百官

之罪

唐百官志

又太和七年赦文云御史臺所置六察分糾

百司又大中元年御史臺奏狀以御史臺臨制百司糾

繩不法若事簡則風憲自肅事煩則紀綱轉輕

唐會要

臺無長官

御史大夫李承嘉嘗召諸御史責曰近日御史言事
不諮大夫禮乎蕭至中曰故事臺中無長官御史人
君耳目比肩事主得自彈事若先白大夫而許則彈
大夫不知白誰也

唐會要

控制南司

北魏崔暹為御史中尉尚書移牒索御史監選不與
及暹為僕射還索御史宋遊道判云崔僕射昔在憲

司籠架北省今居禮閣控制南司遂不與

北史

卿處南臺

北齊王高澄用崔暹為御史中尉宋遊道為尚書左丞謂之曰卿一人處南臺一人處北省當使天下肅

然

通典注

謂外臺

唐至德後諸道使府叅佐皆以御史為之謂之外臺

職林

開北門

御史臺在宮闕西南其門北開取肅殺之義

鄴都故事又

或曰隋初移都之時兵部尚書李圓兼御史大夫欲

向省便故開北門

譚賓錄

初擊隼

漢家授署御史多以立秋蓋以風霜始嚴鷹隼初擊

杜牧之集制

獨擊鷗

王敏懿公素字仲儀既升臺憲風力愈勁嘗與同列奏事上前事有不合衆皆引去公方論列是非俟得旨乃退帝曰真御史也議者目為獨擊鵲同上

彈宰相

王陶彈宰相韓琦不押班琦乞出詔琦起視事曰覽臺簡之忽陳規邦彛之浸畧丁未錄

論濮王

治平元年正月臺官論濮王事甚急呂誨等疏已七

八上不聽遂皆納勅告求去而執政方密啟禁中自

定乃尊濮王為皇

言行錄

豸冠彈事

肅宗乾道二年制御史臺欲彈事不須進狀仍服豸

冠

唐會要

鷩車察罪

舊制御史以鷩羽飾車以白鷩見泉中魚象御史察

微隱之罪

唐臺儀

繡衣直指

御史有繡衣直指出討姦滑治大獄武帝所制不常

置注衣以繡者尊寵之也

前漢百官志

白簡待旦

晉傅玄天性峻急每有奏劾或值日暮捧白簡整襟坐以待旦於是貴遊懾伏臺閣生風

進呈訖了

治平中執政恃權以沮言者凡臺諫官言入輒以進

呈訖寢之時謂之訖了臺吏亦為之沮報每白御史
言某事又訖了也

脩要

京師絕無

英宗新即位任事者益專凡臺諫官言事一切不聽
或盡逐臺官不留一人京師為之語曰絕市無臺官
古今文集

雜著

重修御史臺記

曾肇

元祐三年新作御史臺成有詔臣肇為之記臣肇伏
自惟念幸得備位從官以文字為職此大手筆雖非
所克堪然義不得辭謹拜手稽首而記之曰維御史
見於周掌贊書受法令而已戰國以致執法亦記事
之職也至秦漢始置大夫位亞丞相副曰中丞督部
刺史受公卿奏事舉劾按章其屬有侍御史出討奸
猾治大獄於是專繩糾之任厥後政事歸尚書而御
史與尚書謁者竝為三臺大夫更為三公而中丞為

臺率與尚書令司隸校尉朝會皆專席為三獨坐隋
唐遂置大夫天下有寃而無告者得與中書門下省
詰之謂之三司自是御史益為雄峻其屬則有殿中
監察并侍御史為三院侍御史一人知雜事橫榻而
坐謂之南牀皆專彈劾不言事本朝因之至真宗皇
帝增置言事御史其後皆得言事御史相率廷辯小
則人得自達故其任視前世為尤重非但謹朝會聽
獄訟而已列聖相繼皆假以寬仁使得自竭是以風

采所加百僚震肅朝廷倚而益尊奸邪望而知畏初
本朝雖因唐制然以大夫為兼官不治臺事以郎中
員外郎兼侍御史知雜事以二中丞以太常博士以
上為三院未至者則為御史裏行監察故事內察尚
書六曹外巡按郡縣久之亦廢至神宗皇帝大正官
名始歸大夫職以侍御史治雜事罷御史裏行而復
六察官分守既定乃相官府蓋御史臺遷於宣化坊
自開寶五年纔有東西獄七年雷德驥分判三院事

請於上而大之屋不及百楹天禧二年復詔增廣遂至三百六十楹訖于元豐七年寢以圯壞神宗皇帝倂圖程工以授有司舊闕大夫聽事踵鄴都制度闕門北鄉取陰殺之義仍形勢痺下無以重威至是命置大夫聽事闕門東鄉增痺為崇培下為高其視規撫宏遠以繼志述事屬于後又今上即政之初務先慈儉土木之勤咸詔勿事惟臺之建實遵先訓猶以大夫虛員姑省營築闕門北鄉仍故不改經度損益

斷自聖心以元祐二年六月己亥始事三年八月庚辰卒工用人力十萬五千為屋三百五十一楹視舊小貶而亢輿過之門閭耽耽堂室渠渠長貳佐屬視事燕休翼翼申申各適所宜吏舍囚圜深靚嚴固案牘簿書棲列有序所以觀示都邑表正憲度揆諸典章於是為稱昔周人考室見於風雅魯國作門記諸春秋後世傳誦為載籍首恭惟神宗皇帝受命承序十有九年建立經常皆應古義好惡無私賞罰不僭

而綱紀是張宮室弗營池籩苟完而府寺是崇故能
垂精風憲之司以啟後嗣之意二聖恭已開闢言路
聰無不聞明無不燭士有以言獲福不聞忠以取禍
耳目之地寵遇莫抗故能新是棟宇以成前人之志
是宜著在文字刻之金石以度越周魯垂休無窮顧
臣之愚言語淺陋何足以發揚聖德稱明詔之萬一
哉雖然臣嘗聞之責人非難責己惟難御史責人者
也將相大臣非其人百官有司非其職天下之有敗



法亂紀服詭菟慝者御史皆得以責之然則御史獨
無責乎哉居其位有所不知知之有所不言言之有
所不行行之而君子病焉小人幸焉此御史之責也
御史雖不自責天下得以責之惟其不難於責已則
施於責人能稱其任矣能稱其任然後危冠盛服崇
墉峻宇游焉息焉可以無媿苟異於是得無餒於中
哉臣故不自揆輒因承詔誦其所聞以告在位者使
有以仰稱列聖褒大崇顯之意焉

御史臺廳壁記

陳賈

宋朝三院御史皆得論政事糾官邪元豐紹聖著于
甲令其用峻故其選精一時列職其間悉繇天子親
擢太上中興大明國是耳目所寄必惟其人紹興更
化詔除公正之士以革締交合黨之風已而又降札
書刊元豐手詔于臺院蓋欲遵用忠純體國之人以
成篤厚之政先後丁寧昭若日月龍蛇飛動琬琰光
輝聖意相傳家法不改實我宋維持紀綱之盛事凡

職于此者宜有考焉紹興辛酉嘗彙集建炎以後名氏歲月續靖康而上所載人以官繫開時深遠兩碑盈溢面背叅覽者既病來者復無以容賈以罷與誤東拔嘗待罪其間院久敝蠹既葺新之於是又與同列謀易新石更繫以歲後先從其時日使皆粲然無所抵牾於以登載中興以來風憲得人之盛以傳不朽顧不足以增重紀綱之地乎石既具囑賈識其顛何敢以骭骭辭淳熙十四年九月既望記

御史臺石柱題名記

噫世移鳥紀俗變鶉居萬法懸而有為五刑設而並
用御史之職誰能廢焉所以防僭濫而窒奸邪也洎
乎晉改天邑梁為帝都霜臺凜然不易舊制我國家
法有一定政無多門羣官競修百吏端肅中執臺劉
公時憚直氣朝推正人軌物用長作事圖遠自建隆
之後或假秩外任或執法在廷悉刊堅珉永示來葉
時大宋御歷之四載歲在癸亥月建丁巳甲午日記

烏臺賦

張良器

士有利於鴻漸者觀乎靈臺降太液邇蓬萊風威四
驚霜氣傍催地䟽曹而獨秀居對禁而分開提綱必
理舉職惟才門凌晨而豸出樹夕陽而烏來旌良表
正瘳惡絕回乍以飛騫淒其疑矣時為搏擊吁可畏
哉嚴城岑寂靈臺蹇產直狀臨而逾明偽迹投而遽
剋故座有彝法門無濫板理從擾而庭幽事雖繁而
人簡及夫貪吏無厭豪宗不戒酷奮黔俗洪威桎械

致中興之淪否令下人之凋瘵百城相師而自若五兵
又安而不怪是司也故以矜遠聲哇長喟

苦怪反

奉絲綸

以遐察騰錦車而遙屆則跋扈顏沮強梁志憊望驄馬
而跼蹐仰繡衣而下拜是知上能贊聖下足安凡顧盼
而朝班已肅推彈而邦度增嚴庶究厥能請循其始官
則秦置臺從漢起或掌方書或稱柱史朱何以忠雅標
懿栢陳以剛直著美上封則起於鄭均埋輪則遠聞張
紀虞詡之人方側目暴勝之名兼直指皆玉秀珠明鷹

瞬鶚視既幹時而助化亦圖國而遠耻莫不才挾主以
成功主因才而共理唐績玉葉蓋臣惟哲法省羸列臺
兼負薛昂涼階春奮迅霜雪耿獨坐而情雄邈羣司而
位絕稠人廣衆望影而魂褫暴黨奸雄覩形而膽析豈
徒以聳動僚采逡巡朝列儻吾道之將行庶從茲而振
節

御史大夫

歷代沿革御史大夫秦官也漢因之應劭曰侍御史

之率故稱大夫掌副丞相成帝綏和元年更名大
司空哀帝建平二年復為御史大夫元壽二年復
為大司空魏建安置御史大夫北齊後周並不置
大夫而以中丞為臺主隋諱中字依秦漢置御史
大夫降為正四品唐武德中改御史臺大夫從三
品龍朔改為大司憲咸亨復為大夫光宅中分為
左右臺大夫及廢右臺去左右字從三品掌以刑
法典章糾正百官之罪惡五代會昌六年升御史

大夫為正三品宋以御史大夫為兼官正二品元以御史大夫為從二品

羣書要語內承風化外任統理才茂行潔違於從正

谷永上疏

辟臺要秩非德靡升專席雄班惟賢是屬

楊左思

檢校右臺大夫制

古今事實

銀印青綬

漢制御史大夫位上卿銀印青綬掌副丞相

百官志

金印紫綬

成帝綬和元年更御史大夫為大司空金印紫綬

立朝正色

唐李景讓為御史大夫正色立朝時元宗舅鄭光卒
詔罷朝三日景讓上書言不可使外戚強盛乃罷朝
兩日

奏事忘食

漢張湯為御史大夫每朝奏事日旰天子忘食丞相

充位而已

博士退服

漢倪寬為御史大夫初梁相褚大通五經為博士時寬為弟子及御史大夫缺徵褚大大自以為得御史大夫至洛陽聞寬為之褚大笑及至與寬議封禪於上前大不能及退而服曰上誠知人

羣僚側目

唐開元中崔隱甫為御史大夫引故事奏以不便帝

謂曰卿為御史海內咸云稱職甚副朕之所委又憲司故事大夫以下監察御史競為官政畧無承稟隱甫一切督責事無大小悉令諮決稍有忤意者便列上其罪前後貶黜殆半羣僚側目

入奏擁姬

周昌為御史大夫嘗入奏事高帝方擁戚姬昌還走帝遂得昌騎頃問曰我何如主也昌曰陛下即桀紂主也於是上笑之然尤憚昌

直諫御船

薛廣德為御史大夫直言諫諍上酎祭宗廟出便門欲御樓船廣德當乘輿免冠諫曰宜從橋陛下不聽臣言臣自刎以血汚車輪上不說張猛曰臣聞主聖臣直御史大夫言可聽上曰曉人不當如是耶乃從橋

貴戚泥樓

李景讓為御史大夫內臣貴戚泥樓有看街樓閣皆泥

之畏其彈劾

本傳

宰相避路

唐制大夫中丞午後三刻出回避丞相如午前出宰相

回避大夫中丞

唐臺儀

白黑分明

薛宣以明習文法詔補為御史中丞是時宣為中丞執法殿中外總部刺史數言政事舉奏部刺史郡國二千石所貶退稱進白黑分明由是知名谷永上疏曰御史

大夫內承本朝之風化外佐丞相統理天下任重職大
非庸才所能堪今當選於羣卿以充其缺竊見少府薛
宣才茂行潔達於從政是用越職陳宣行能唯陛下留
神考察上然之遂以宣為大夫

議論無拂

陳萬年為御史大夫與丞相于定國並位八年論議無
所拂

不避權勢

薛謙光拜御史大夫時僧惠範恃太平公主權勢逼奪
百姓謙光將加彈奏或請寢之謙光曰憲臺理冤滯何
所迴避朝彈暮黜亦可矣

不屈王公

韋思謙進御史大夫性謇諤顏色莊重不可犯見王公
未嘗屈禮或以為譏答曰耳目官固當特立雕鷲鷹鷂
豈衆禽之偶奈何屈以狎之

謝位勸功

韋挺拜御史大夫太宗嘗謂挺曰卿之任御史大夫獨朕意耳左右大臣無為卿者卿勉之哉挺謝曰臣駑不足以辱高位且臣非勲舊而超處藩邸故僚之上臣願後之以勸立功者太宗不許

坐位易處

杜延年亦明法律為御史大夫居父官府不敢當舊位坐卧皆易其處

以名望拜

李光素拜御史大夫自貞元中位缺久難其人至是光素以名望召拜中外聳聽

以長者稱

張歐為御史大夫未嘗言按人官屬稱為長者亦不敢欺上具獄事有可却却之不可者不得已為涕泣面而封之其愛人也如此

持印以視

周昌為御史大夫徙為趙相高祖持御史大夫印弄之

曰誰可以為御史大夫熟視趙堯曰無以易堯遂拜御

史大夫

趙堯傳

執法而舉

叔孫通起朝儀會長樂宮成置酒御史執法舉不如儀

者輒引去

本傳

請削侯地

晁錯遷御史大夫請諸侯之罪過則削其地奏上上令
列侯宗室集議莫敢難錯獨竇嬰爭之由此與嬰有隙

奏去副封

漢故事上書為二封其一曰副領上書省先發之有不善屏去不奏及魏相為御史大夫奏去副封以防壅蔽

布被飾詐

汲黯謂上曰公孫弘位在三公俸祿甚多然為布被此詐也上問弘弘謝曰有之夫九卿與臣善者無過黯然今日廷詰弘誠中弘之病夫以三公為布被誠飾詐欲以釣名今臣弘位為御史大夫為布被自九卿已下至

於小吏無差誠如黯言且無黯陛下安聞此言上以為有讓益賢之

嘗糞驗疾

御史大夫魏元忠卧疾諸御史盡省之郭霸獨居後請視元忠便液以驗疾之輕重元忠驚悚霸曰大夫糞味甘或不瘳今味苦當即愈矣元忠剛直殊惡之

兄弟並拜

肅宗幸靈武李峴應召至行在拜扶風太守既收京師

拜戶部尚書守京兆尹兼御史大夫時峴兄峴為武部侍郎成都尹兼御史大夫乾元初玄宗還京自蜀至又兼御史大夫兄弟俱判臺事時長安士庶皆美之

古今文集

雜著

御史大夫壁記

李華

君以文明照臨百官官糾其邪職有邦憲由京師而端下國王化所繫不惟威刑御史大夫其任也用舍決於

天心得失震於人聽舉直措枉果而不撓則公卿屏氣
道路生風率其屬以正于朝瞻我衣冠不仁者遠苟異
於是為君子羞政之雄雌與德輕重故名公在位天下
仰賴焉秦官有御史大夫在漢為三公職副丞相丞相
闕則大夫遷或名司空或復舊號史足徵也議大政必
下丞相御史其廷署古曰府近曰臺其衣冠章綬品秩
所視載於甲令聖朝臣唐虞高尚之賢內周漢不賓之
俗登人於五福薦樂於九歌帝德廣運而瑞草生天威

震動而神羊至故柱石骨鯁之老更拜焉距義寧至先天登宰相者十二人以本官叅政事者十三人故相任者四人藉威聲以稜徼外按戒律者八人官或改稱大司憲臺或分為左右肅政罷置不恒從所宜也開元天寶中刑措不用元元休息由是務簡並重地清彌尊任難其人多舉勲德至宰輔者四人宰輔兼者二人故相任者一人兼節度者九人異姓封王者二人尊號加孝德之明年樂成公自尚書左丞兼文部遷崇德也昭融

禮經嗣續文雅張仲孝友山甫將明風度可以師長人
倫動靜可以訓齊天下喬嶽鎮定嘉量平均心為百行
之宗體備四時之氣雅有之曰文武吉甫萬邦為憲樂
成有焉至若教行於無訟之前憲因於未萌之始未萌
而慮則求煩不獲無訟而教則何用不臧寬細瑕為大
體復故事為新政小人畏法君子夷心無隱情於國家
無愧辭於神道堂堂乎大雅之素也初廳壁列先政之
名記而不叙公以為艱難之選將俟後人謂華嘗備屬

察或知故實授東之恩至屬詞之藝寡無以允副非常之待所報者直質而少文天寶十四載六月十五日記

御史中丞

歷代沿革周官小宰之職掌建邦之宮刑凡宮之糾禁即

御史中丞之任也

周禮注曰小宰若今御史中丞

秦時御史有二丞其

一御史丞其一為中丞外督部刺史內領侍御史受公

卿奏事舉劾按章漢因之亦謂中丞為中執法

以其居殿中故

曰中丞

晉宋以下不置大夫以中丞為臺主自齊梁皆謂

之南司後魏為御史中尉後周有司憲中大夫隋以國
諱省中丞以持書侍御史二人代中丞之任唐制大夫
掌糾正百官之罪惡中丞為之貳五代亦有之宋沿唐制
大夫無正員止為兼官中丞除正員外或帶他官者尚
書則曰某官兼御史中丞丞郎則曰御史中丞兼某官
給事中諫議則曰某官權御史中丞事次有知雜御史
一員副中丞判臺事自中丞以下掌糾繩內外百官姦
慝肅朝廷紀綱大事則廷辨小事則奏彈

兩朝制

元豐七年詔

中丞雜歷在六曹侍郎之上元以御史中丞為從三品

羣書要語簡上霜凝筆端風起

崔篆御史箴

望威憲府名重

法冠

孫樵紀室新書

內榮獨坐外總百僚

同上

俾增石室之榮

唐大

詔

有守者可以執憲無私者可以閑邪

白集柳公綽制

煌煌天

文宿星是環爰立執法其輝有煥執憲之綱秉國之憲

鷹揚虎視肅清違慢

傅咸作中丞箴

憂責有在繩亦必直良農

耘穢勿使能殖無禮是逐安措羽翼

同上

周興鐵柱漢制

繡衣簪白筆而繩違馭驄馬而明目故能出則督察萬

里入則糾劾百僚揚摧而言惟賢是寄必須名高河朔

價重漢南諤諤清風翩翩妙拔心焉靡石直也如絃北齊

司馬子端為中丞選御史云

憲席持綱亦資糾正

胡文恭行柳植制

絳騶

清路白簡深刻

宋何尚之與顏延中丞書

總憲度於朝端植風聲於

天下其所以翼于君正於人者尤可知也

柳子厚御史中丞廳壁記

中朝執憲之司四海繩違之地凡居中外皆候整齊五代

會要

陛下使臣拾遺補闕以輔盛德明善正失以平庶政

舉直錯枉以正大臣臣當極其力以死繼之

傅獻簡公言行錄

詩句白簡光朝列彤駟出禁中

緒亮

古今事實

掌藏石室

御史大夫秦官有兩丞秩千石一曰中丞在殿中蘭臺

掌圖籍祕書

漢百官表

又中丞有石室藏祕書圖識之屬

環濟

要畧

執憲蘭臺

漢中丞故二千石為之或選侍御高弟執憲中司

通典注

又丞故二千石執憲中司掌蘭臺督諸州刺史糾察百

僚

蔡質漢儀

又傳賢拜中丞執法中司百僚敬服

執憲轂下

谷永疏曰薛宣前為御史中丞執憲轂下不吐剛不茹

柔舉錯時當

漢史

執法殿中

薛宣為御史中丞執法殿中外總部刺史

漢本傳

漢元帝

擢陳咸為御史中丞總領州郡奏事課第諸御史內執

法殿中公卿以下皆畏憚之

本傳

銅印青綬

後漢中丞兩梁冠銅印青綬

漢儀

玉佩絳幘

宋中丞銅印墨綬進賢兩梁冠佩水蒼玉介幘絳朝服

通典

烏衣郎官

王僧虔為御史中丞甲族由來多不居憲臺僧虔為此

官乃曰此是烏衣郎坐處

南史

青箱御史

王淮之自曾祖彪之博聞多識練悉朝儀其家世相傳並譜江左舊事緘之青箱世謂之王氏青箱命御史中丞為百僚所憚自彪之至淮之四世此職焉

南史

號三獨坐

光武特詔御史中丞與司隸校尉尚書令會同竝專席而坐故京師號曰三獨坐

後漢史

稱三得人

宋張昇謚康節仁宗諭執政曰張昇清直可任風憲乃
以為御史中丞時富弼為相歐陽脩為翰林學士論者
以為三得人

實錄

近世獨步

梁江淹字文通為中丞明帝曰今君為南司足以震肅
百僚也淹乃彈中書令謝朓等內外肅然帝曰自宋以
來無嚴明中丞君今日可謂近世獨步又江淹兼中丞

彈劾不避權勢

一時髦彥

江左中丞雖一時髦彥然膏粱名士猶不樂通

典通

曰真宰相

武元衡遷中丞延英對罷德宗目送之曰真宰相持平

無私綱條悉舉

唐本傳

可謂王臣

熊遠遷御史中丞上每嘆其公忠謂遠曰卿在朝正色

不如柔吐剛忠亮至勁可謂王臣

晉史

號為老虎

晉崔鴻為中丞明法直繩無所阿避號為老虎

晉書

惠開為中丞詔曰奉法直繩不阿權威又傳宣為中丞

明法直繩內外震肅

南史

號曰龍門

任昉為中丞簪裾輻湊預其讌者殷芸到溉劉孺顯劉孝綽陸倕而已號曰龍門之遊雖貴公子孫不得預也

南史

圖形臺省

張緬為中丞號為勁直梁武帝遣圖其形於臺省以厲

當官

同上

兄弟竝駙

梁張綰字孝卿為中丞兄績為僕射元日朝會及百司

就列兄弟竝駙兩塗時人榮之

三朝要畧

三世居官

盧奕拜御史中丞自懷謹煥及奕三世居此官清節似

之時傳其美

唐本傳

四世此職

見前青箱御史

得風憲體

王舉正皇祐中為中丞會張堯佐一日領四使留百官班廷議不可又狄青為樞密使力爭不能奪因請改言職上稱其得風憲之體遂除觀文殿學士

選老成者

仁宗嘗言中丞紀綱之首須選老成者為之朕弄印久矣無如吾同姓命趙槩為之

薦未相識

孫參抃為御史中丞薦唐介吳中復為御史人或問曰君未嘗與二人相識而遽薦之何也答曰昔人恥呈身御史今豈求識面臺官也後二人皆以風力稱於天下

東軒
筆錄

事必先白

御史臺故事三院御史言事必先白中丞自劉子儀為中丞始榜臺中今後御史有言不須先白中丞至今如

此

歸田錄

出自朕選

唐介召為御史中丞太宗面諭曰卿在先朝有直聲今出自朕選非由左右言也

同上

不辱吾筆

程文簡公琳權御史中丞宰相張知白

謚文節

曰是不辱

吾筆矣

奏劾賊吏

梁陸杲為御史中丞性鯁直無所顧望時山陰令虞眉在任贓汙杲奏收劾之中書舍人黃睦之以眉事託杲杲不答武帝聞之以問杲杲曰有之帝曰識睦之否荅曰不識其人睦之在御側上指示曰此人是也杲謂曰君小人何敢以罪人屬南司睦之失色

指切時事

張昇為中丞仁宗以昇指切時事無所避曰卿孤特乃能如是昇曰臣朴學愚忠仰託睿聖是為不孤今陛下之臣持祿養交者多而赤心報國者少似陛下孤立也仁宗亦為之感動

仁宗實錄

百寮嚴憚

馮嚴字威卿拜中丞嚴舉劾按章申明舊典奉法察舉無所回避百寮憚之

東觀

百寮震肅

宋孔琳之為御史中丞明憲直法無所屈撓奏劾尚書

令徐羨之

云

百寮震肅莫敢犯禁

南史

百官避路

江左拜中丞不得復入尚書省中丞鹵簿至百官避路

分紀

王公遜道

後魏御史中丞其出入千步清道與皇上太子分道王

公遜避

北史

內外憚之

宋荀伯子為中丞立朝正色內外憚之

同上

遠近畏之

後魏李彪遠近畏之豪右屏迹高祖謂羣臣曰吾之有

李生猶漢之有汲黯也

北史

氣貌孤峻

崔從氣貌孤峻正色立朝彈奏不避裴度為中丞用從

自代

風望峻整

高元裕開成中遷中丞風望峻整上言曰御史府紀綱之地官屬選用宜得實才其不稱者臣請出之

辟由憲長

憲府故事三院御史由大夫中丞自辟獨孤朗為中丞時崔沔鄭居中不由憲長而除授朗拒不納

通典

官為臺長

唐會昌元年中書門下奏大夫秩崇官不常置中丞常

為憲臺之長

武宗會要

畏其筆端

劉瑀恃性使氣尚人為御史中丞甚得意彈肅惠開云
非才非望非勲非德莫不畏其筆端

為之紙貴

江文蔚常為御史中丞國朝自王義後曠數百年未有
危言激論如此之彰灼者故權右振竦朝野喧騰謗寫
彈文為之紙貴

徐駢省為志

首進六事

胡宗愈元祐中為中丞首進六事曰端本正志知難加
意守法畏天且言陛下從吉之初若留神於此六者則

治道成矣

事畧

讀傳數行

豐稷為中丞宦官浸盛稷懷唐書上殿為上讀仇士良

傳數行上曰已諭稷偽不聞讀畢

九朝通畧

朝廷肅然

徐陵為御史中丞時安成王頊為司空以帝弟之尊權
傾朝野直兵鮑僧獻假王威風抑塞詞訟陵乃引南臺
官屬奏彈之自是朝廷肅然

南史

權豪震肅

晉周處為中丞奏石崇王彤等正繩直筆權豪震肅

本傳

武冠執囊

梁中丞給威儀十人其八人武冠絳鞬執青儀囊在前

南史

籠街喝道

舒元褒上疏曰元和長慶中中丞呵止不過半坊今乃至兩坊謂之寵街喝道但以崇高自大

唐書

橫挺待賢

御史臺有閤吏隸臺中四十年聲喏之時以所執之挺待中丞賢否賢則橫其挺不賢則直其挺凡為中丞惟恐其直時范諷為中丞一日視其挺直范問曰爾挺忽直豈我之失耶吏曰昨日中丞召客諭庖人造食指揮者數四去又教戒之數四大凡役人者授以法觀其成

何俟喋喋之繁若使宰天下如此不亦勞乎某心却之
不知杖之直也范大笑慚明日視之挺復橫矣

東軒
筆錄

賜扇美獻

張詠為御史中丞時真宗令進所著述且稱文善取常
執綃金龍扇以賜之曰美今日獻文事

言行
錄

法自貴始

韓康肅公絳權御史中丞孫沔呂溱等守藩犯法從官
聯章請賞其罪公曰法自貴者始更相救援則公道廢

矣遂并劾之

言行錄

恩不假人

杜衍為中丞自宰相而下畏之曰是不肯以恩意假人者也

事畧

鳳與鷹異

上曰牛僧孺可為大夫鄭覃曰頃為中丞未嘗搏擊恐

無風望上曰鸞鳳與鷹隼事異

文宗實錄

鷹揚虎視

見前羣書要語

引裾論奸

仁宗以夏竦為樞密使臺諫交論論其奸邪上未省遽起中丞王拱辰懿恪引上裾前後十八疏乃罷

言行錄

舉袖彈文

熙寧王介甫初拜叅政呂獻可任御史中丞將入對而翰學司馬溫公侍講邇英亦將趨資善堂以俟宣召於路溫公密問曰今日請對欲言何事獻可舉手曰袖中彈文乃新叅也溫公愕然曰奈何論之獻可曰王安石雖有時名然好執偏見不通物情在侍從或可容置之政府則天下

必受其弊上新嗣位朝夕與謀者二三執政苟非其人將敗國事此乃心腹之疾顧可緩邪未幾介甫變法百姓騷然溫公退居洛陽每曰呂獻可之先見予所不及

聞見錄

論宰相專恣

宰相呂頤浩專恣中丞趙鼎論之遷鼎翰林學士鼎引司馬光故事以不習駢驪不就遷吏書復辭章十數上

頤浩罷鼎即出視中丞事

系年錄

論元豐調停

蘇轍為御史中丞時元豐舊黨分布中外多起邪讒以
搖撼在朝呂微仲劉莘老遂欲引用其黨以平舊怨謂
之調停轍於延和面論其非退以劄子奏入宣仁后命
宰執於簾前讀之仍諭之曰蘇轍疑吾君臣兼用邪正
言極中理自此叅用邪正之說衰矣

言行錄

古今文集

雜著

辭免中丞表

呂中丞

總持憲綱叅聯諫列時須選東宜屬全才聞命便蕃俯

躬跼蹐

中謝

伏念臣品出中下能乏寸長嗣承闕闕之

基粗知仁義之訓惟堅信道不悟違時出入諫垣者九年遷謫麾符者四郡向因陞見得邇天光被聖訓之垂褒為孤忠而有立自惟疏遠之迹何勝特達之知一身至微萬死寧報匪圖東拔益厚恩輝旋自內朝之班進陟中司之任不離言職更踐清除行匪風節之著聞言厭縉紳之聚論憂畏之甚起處靡遑斯蓋伏遇陛下勵

精永圖更張大化博求俊乂振舉朝綱宜得名臣以肅
時政一有虛授然累至公敢期委照之明追寢已行之
命知人則哲庶無玷於君俞量力而為俾克全於臣節
永淵是懼進退無從

謝除御史中丞表

蘇子由

視草禁中既極儒臣之選專席朝右復膺忠告之求兼
延閣之寵名增南司之榮觀退循淺拙徒積矜危

中謝

伏以仁聖在宥五年于今恭儉無為四方稱治然而矯

枉之過苛吏適去而寬弛相尋革故之難弊事雖除而
條網尚紊民貧未可經遠吏竊難於責功是謂守成之
難宜有厲精之實幸臺綱之一舉措國是於無疑如臣
才力之微勉強何及此蓋伏遇太皇太后陛下德惟主
善政貴日新閔風俗之惰媮審詞說之忠佞知逆耳之
利行察邇志之多非是以度越舊賢收掇微賤然臣迂
愚之質砥礪莫知顛沛之餘衰罷益甚言之無補昔已
效於諫垣文不適時比復陳於翰苑恩深莫塞才短奚

為惟有事君之小心每欲終身於直道折而不屈蓋蓬蒿之自然晦而猶鳴亦鷄鵠之常性志效捐軀之報未加授命之晨拜伏在廷俯仰增愧

御史中丞壁記

李華

皇帝受天明命垂五十年大道成俗黎民於變百官設而無事三辟存而不論振古未然也猶以為成歲資於降霜律人本於持憲憲司之拜尤覈名實王猷其遠乎夫察風俗平冤滯踣邪佞延俊賢云誰司之職惟御史

御史亞長曰中丞貳大夫以領其屬士丐為伯游之佐
司馬乃令尹之偏古之制也漢儀大夫副丞相以備其
闕叅維國綱鮮臨府事故中丞專焉意者殄兇人之豪
扶君子之道各行其志無所牽束行止與大臣絕位指
顧則周行振聳政體宜之晉宋元魏以還無御史大夫
由是中丞威望愈尊禮有加等如火烈烈如霜肅殺不
可犯也屬時清無獄朝尚寬政行葦忠厚王化根源周
室仁及草木而愷悌流乎頌聲漢文雅好黃老而公卿

恥言人過舉盛德則儀刑著矣焉用察察闕闕以恟主
人哉欲以此道行於軍旅故東西幕府皆兼大夫餘軍
多假憲司之號聖皇之志也天寶中君臣於道德之間
又新其化以尚書左丞張公為大夫太府少卿庾公為
中丞天下翕然名教知勸大夫睦中丞也羽翮得清風
之助中丞奉大夫也呂律本黃鍾之宮耆儒碩老罕云
遇此盛矣公中和備體沉潛經德易直且武溫文而清
遵王路以整多方由夫身而貞百度此外盡餘事也古

之制記者先諸德而後諸事至若命官之始省復之代名號冠綬之差祿秩位員之數辭尚體要况皆知之今不書省文也華昧學淺藝承命維谷羣言之首非所克堪然故吏也勉以酬德天寶十四載九月十日記

諸使兼御史中丞廳壁記

柳宗元

古者交政於四方謂之使今之制受命臨戎職無所統屬者亦謂之使凡使之號蓋專焉而行其道者也開元以來其制愈重故取御史之名而加焉至于今若干年

其兼中丞者若干人其使絕域統兵戎按州部專貨食而柔遠人固王畧齊風俗和闕石大者戡復于內拓定于外皆得以壯其威張其聲其用遠矣假是名以涖厥職而尊嚴若是况乎總憲度於朝端樹風聲於天下其所以翼于君正於人者尤可以知也武公以厚德在位甚宜其官視其署有記諸使中丞者而多闕漏於是求其故於詔制而又質於史氏增益備具遂命其屬書之且曰由其號而觀其實後之居於斯者有以敬于事

上孔中丞書

石介

夫子之道不行於當年傳於其家直四十餘世以俟子孫如此其遠也夫子沒後世有子思焉安國焉穎達焉止於發揚其言而已有漢相光唐相緯雖得位亦不能盡行其道夫子之道其肯鬱然蟠伏於其家乃躍起奮出散漫於天下天下人皆可以得之漢高祖唐太宗能得之於上以之有天下三百年孟軻楊雄文中子韓愈能得之於下以之有其名於億萬世唯孔氏子孫無有

得之者俟四十餘世僅二千年閭下乃得之今夫子之道不專在於閭下也閭下又且赫然有聲烈於天下復得位於朝見用於天下閭下徒能得夫子之道其將以夫子之道事於聖君施於天下俾國家為二帝為三王為兩漢為鉅唐矣夫子之志曰吾志在春秋春秋天子之事也世衰道微邪說暴行有作臣弑其君者有之子弑其父者有之夫子懼之而又時無君已無位不能誅不能正乃作春秋焉所以正王綱舉王法故春秋成亂

臣賊子懼為司寇則七日而誅少正卯於兩觀之下攝
相事則齊終不敢窺兵河南當時之君則昏也當時之
位則攝也尚不及閣下得明君有大位為中丞逾月而
未聞有舉焉閣下在朝朝廷尚有奸臣敢在位天下蠹
賊未悉除是夫子道猶未克盡舉豈夫子直四十餘世
僅二千年以俟閣下閣下宜念之且天子之設御史府
尊其位崇其任不與他府並舊有大夫則中丞亞大夫
而領其屬今大夫闕則中丞其長也故中丞之任特重

馬中丞之責尤重焉君有佚豫失德悖亂亡道荒政拂
諫廢忠慢賢御史府得以諫責之相有依違順旨蔽上
罔下貪寵忌諫專福作威御史府得以糾繩之將有驕
悍不順恃武肆害玩兵棄戰暴刑毒民御史府得以舉
劾之君至尊也相與將至貴也且得諫責糾劾之餘可
知也御史府之尊嚴也如軒陛之下廟堂之上進退百
官行政教出號令明制度紀賞罰有不如法者御史得
言之御史府視中書樞密雖若卑中書樞密亦不敢與

御史府抗威爭禮而返畏悚而尊事之御史府之重其
無與比然須得如閣下者居之始貴矣易曰苟非其人
道不虛行禮曰人存則政舉閣下聖人之後又能得聖
人之道以方重剛正公忠清直烈烈在於朝為天子獻
可替否贊謀猷持綱紀天下想望其風采者十五年間
簡於清衷期將大用且歷觀於外更觀其能違更三大
藩皆卓然有治聲聞於天府浹於日下御史府中丞虛
位日班於紫宸殿下佩金煌煌行聲鏘鏘且有百數天

子弗錄之乃南定三百里以驛召閣下直入其府登其
位自陞下獨決萬機來登崇俊良黜逐纖人革故鼎新
百度修舉太平之望日月以隆然而天人之心猶鬱然
不大舒釋者以閣下尚稽大任也至是天人之心始大
舒釋矣閣下自初及終皆以直道進詩曰靡不有初鮮
克有終介嘗聞朝大夫語曰有某官為某官時忠鯁直
讜蹇蹇敢言觸龍逆鱗不避誅死由是人主知之聲名
藹然聳動朝野不四五年取顯仕今為某官位彌高身

彌貴祿厚惠渥私庭曳青綬者五六人門前炎炎可炙
手顧此勢力榮寵有所惜也如有物塞其耳如有葉蔽
其目如有鉗鉗其口朝廷有關政國家有遺事若不聞
若不覩而不復言則嚮之忠鯁謹直蹇蹇敢言乃沽名
耳其以為速進之媒乎意士之積道德富仁義於厥身
蓋假於權位以布諸行事利於天下也豈有屑屑然謀
夫衣食者歟正色直己立於朝廷行其道乃使天下有
此論庸無傷乎古今君子少小人多君子常不勝小人

小人不惟常勝君子而又不能容之惡直醜正嚚嚚實
繁幸而有一君子在於朝則百小人排之非鐵心石腸
剛正不折未有不隨而靡者小人不容君子也如是而
不能死節以永終譽中塗晚節須有渝變宜其為小人
之所排也今有人位未顯身在下能堅正不顧其身敢
直言極諫犯天子顏色封章抗疏論天下利害羣小人
必叢立指點曰此人速進也沽虛名也非以行道也吁
吾徒不見容於小人也也不敢信於天下也固若是乎學

周公孔子之道不用則卷而懷之用則肯已乎實將施及國家布於天下以左右吾君綏吾民耳羣小人排毀不已無足恠也閤下亦當大警戒之勿使天下有所論則君子幸甚天下幸甚

與臺端書

朱元晦

熹未見顏色比輒妄以姓名自通方以僭瀆自咎乃蒙教答又枉手帖之誨降屈威重謀及踈遠此古人之事而執事者行之甚盛甚盛顧熹之愚不足以當之然敢

無辭以對蓋嘗竊謂欲起膏肓之疾者必攻其受病之處而其用功之緩速制藥之寒溫又有不可以頃刻毫釐差者今天下之病在膏肓者久矣夫人而能知之夫人而欲言之顧以不當其任則雖欲一效其伎而無所施耳乃者天子以執事有庶靖貞孤之操擢寘諫垣納用其言屏去邪惡皆所謂膏肓之餘證海內有志之士知上之心蓋已深悟隱疾之在躬而欲假執事之藥以去之也又知執事之心所以姑從事於此者蓋亦以為

之兆耳其必將有以謹之則夫所謂病本者可去無疑也然而側聽累月未有所聞則又懼夫二豎子者知良醫之傷已而先為術以去之以是憂疑不知所定尚幸聖心堅定不入其言而又進執事於臺端之重是必君臣之間已有一定之計足以少慰士大夫心然熹之愚竊獨私憂過計意夫姦賊窺見端倪則其所以日為謀者必將愈深愈切而有先執事以發其機者不審執事何以處之蓋伐木而翦其枝葉不若斧其根壅水而捍

其波流不若塞其源鳴金鼓耀戈甲而噪呼以逐虎不若乘其方睡而斃之之速也今執事則既撼而覺之矣又猶欲緩視徐趨以當其虓怒決裂之勢熹竊為執事者危之也然此等小人有生以來自朝至暮無非罪惡不可殫數且又人主素以倡優奴僕畜之初不責以名檢而間者議臣乃復抉擿苛細而一一以陳之其不納則宜矣唯其日侍燕閒逢迎縱吏使人主之心恬於逸欲而法家拂士之言不得以進阻於卑近而正大久遠

之計不得以聞賄賂公行奸邪堵立蓋其所以為天下
國家之綱紀者日傾月壞而上下相蒙莫敢以告是則
此一二人之罪所以上通於天而深為今日膏肓之病
者執事誠能聲此揚于王庭深贊聖主去邪勿疑之志
又引同列之賢合謀并力以決去之則天下膏肓之病
者庶幾其可去矣太平萬歲熹雖不武尚能為執事誦
之不識執事亦有意乎熹比因三月指揮已畧為明主
言之矣顧踈賤之意未足取信或以取戾謹已束裝恭

俟嚴譴惟執事母以為戒以亟圖之則天下幸甚專此
布稟葢區區之心以古人之事望於執事不復以世俗
之常態自疑伏惟深察引領臺事不勝拳拳

上杜中丞論舉官書

歐陽脩

具官脩謹齋沐拜書中丞執事脩前伏見舉南京留守
推官石介為主簿近者聞介以上書論赦被罷而臺中
因舉他吏代介者主簿于臺職最早介一賤士也用不
用當否未足害政然可惜者中丞之舉動也介為人剛

果有氣節力學喜辯是非真好義之士也始執事舉其材議者咸曰知人之明今聞其罷皆謂赦乃天子已行之令非踈賤當有說以此罪介曰當罷脩獨以為不然然不知介果指何事而言也傳者皆云介之所論謂朱梁劉漢不當求其後裔爾若止此一事則介不為過也然又不知執事以介為是為非也若隨以為非是大不可也且主簿於臺中非言事之官然大抵居臺中者必以正直剛明不畏避為稱職今介足未履臺門之閤而

已因言事見罷真可謂正直剛明不畏避矣度介之才不止為主簿直可任御史也是執事有知人之明而介不負執事之知矣脩嘗聞長老說趙中令相太祖皇帝也嘗為某事擇官中令列二臣姓名以進太祖不肯用他日又問復以進又不用他日又問復以進太祖大怒裂其奏擲墜下中令色不動挿笏帶間徐拾碎紙袖歸中書他日又問則補綴之復以進太祖大悟終用二臣以彼之取爾者蓋先審知其人之可用然後果而不可

易也今執事之舉介也亦先審知其可舉耶是偶舉之耶若知而舉則不可遽止若偶舉之猶宜一請介之所言辯其是非而後已若介雖忤上而言是也當助以辯若其言非也猶宜曰所舉者為主簿爾非言事也待為主簿不任職則可罷請以此辭焉可也且中丞為天子司直之臣上雖好之其人不肖則當彈而去之上雖惡之其人賢則當舉而申之非謂隨時好惡而高下者也今備位之臣百千邪者正者其糾舉一信於臺臣而執

事始舉介曰能朝廷信而將用之及以為不能則亦曰不能是執事自信猶不果若遂言他事何敢望天子之取信於執事哉故曰主簿雖卑介雖賤士其可惜者中丞之舉動也況今斥介而他舉必亦擇賢而舉也夫賢者固好辯若舉而入臺又有言則又斥而他舉乎如此則必得愚闇懦默者而後止也伏惟執事如欲舉愚者其豈敢復云若將舉賢也願無易介而他取也今世之官兼御史者例不與臺事故敢布狂言竊獻門下伏惟

幸寮馬

古詩

贈孔中丞

梁江總

我行五嶺表辭卿十二年聞鶯欲動詠披霧即依然疇
昔同寮采今隨年代改借問藏書處唯君故人在故人名
宦高清簡肅權豪誰知懷九難徒知泣二毛

律詩

柳宗元詩

憲府初收迹丹墀共拜嘉分行參瑞獸傳墨亂宮鵝

楊億詩

際曉乘騶入九逵內朝簪筆坐前墀天家御史非凡格
曾向崑崙服紫芝

侍御史

歷代沿革周御史掌萬民之治令以贊冢宰凡治者受
法令焉以其在殿柱之間亦謂之柱下史

老聘曾為
柱下史

秦改為侍御史張蒼自秦時為御史主柱下文書即

其任也漢因秦制置侍御史十五員受公卿奏事舉劾按章後漢亦有掌察舉非法受公卿郡吏奏事有違失舉劾之任所掌凡五曹

今曹印曹供曹馬曹乘曹

魏置八人

當大朝會殿中御史簪白筆側陞而坐隋唐又置內供奉掌糾舉百僚侍御史號臺端他人稱之曰端公而知雜事者謂之南床殿中監察不得坐凡侍御史之例不出累月遷登南省故號為南床百日察其行止出入揖讓去就殿中以下皆稟而隨之建中元年

以侍御史分掌公廨推彈自是雜端之任輕矣宋以
中丞為長知雜御史為侍御史言事官為殿中侍御
史六察官為監察御史舊以中丞兼檢理使殿中侍
御史兼左右巡使左右巡使分糾不如法者文官違失左右巡主之武官違失左右巡主之
大夫掌肅正朝廷綱紀及以儀法糾治百官之罪失
而中丞侍御史為之貳元置侍御史二人位御史中
丞之下

羣書要語榮服繡衣寵簪白筆

孫樵記
室新書

御史吾耳目之

官也非清白勁正不泥不撓者安可使辨淑慝振紀綱

廣吾之聰明焉

白集王申伯侍御史制

峩峩鐵冠晶晶銀印

元徽之行

崔既兼制

當憲守雄極之任

徐駢省行盧文徽知雜制

並服豸冠式同綱

憲

同上行王仲連制

率是幹用使持憲綱

同上行盧文徽制

越登司官

肅我朝命

楊荊州誄注司官理書御史

始以御史在長慶寶厯之際

匡拂時病磨切貴近

林牧行高元裕制

處以橫榻使參中司

車曲

制橫榻一異庶工簪筆以奏不法往貳中憲

同上

自執霜

簡頗振憲風

同上行盛陶制

詩句借問持斧翁幾年長沙客

杜甫贈吳十侍御

來簪御史筆

同上醉冠十侍御

鷺鳥得秋氣法星懸火旻

劉禹錫早秋送楊侍御歸朝

晚

趨天闕烏紗薄內直空臺古栢寒

饒易

薄遊忝霜署直指

戒冰心

蘇味道懷臺中諸友

古今事實

鐵柱不撓

侍御史周官也為柱下史冠法冠一名曰柱後以鐵為

之言其審固不撓也

應劭漢官儀

又漢張蒼為柱下史明習

天下圖書

前百
官志

繡衣直指

漢侍御史有繡衣直指出討姦猾治大獄武帝所制不

常置

前百
官表

服獬豸冠

獬豸冠按禮圖曰法冠也一曰柱後惠文如淳注獬豸冠秦制也法官服之按董巴注云獬豸神羊也蔡邕云如淳應劭曰此獸主觸不直故執法者豸之楚王獲神

羊以為冠秦滅楚以其君冠賜執法近臣御史服之

後漢

志與服

懸豹尾車

大駕屬車八十一乘皆尚書御史所載最後一車懸豹尾薛綜注曰侍御史載之

白筆御史

魏當大朝會殿中御史簪白筆側陞而坐帝問此何官何所主辛毗曰此謂御史舊時簪筆以奏不法如今者

直備位但耽

餽音筆耳

三國魏志

白兔御史

王弘義遷侍御史始賤時求傍舍瓜不與乃騰文言園有白兔縣集衆捕逐畦竄無遺內史李昭得曰昔聞蒼鷹獄吏今見白兔御史

國之龜寶

隋柳或為侍御史當朝正色百僚敬憚上嘉之曰柳或正色之士國之龜寶

朝之雄職

王義方曰陛下拜臣侍御史濫朝廷之雄職

本傳

京師避馬

桓典為侍御史執政無所避常乘驄馬京師畏之為之

語曰行行且止避乘驄馬御史

本傳

京尹避路

唐故事京尹遇侍御諸衢當避

唐臺儀

劾專廢立

嚴延平遷侍御史時霍光廢昌邑王立宣帝延平劾奏
霍光專廢立無人臣禮奏雖寢朝廷肅然憚之

本傳

奏無威儀

陳翔拜侍御史元日朝賀大將軍梁冀威儀不整翔奏
請收冀理罪其人奇之

後漢書

頭軻乘輿

申屠剛字巨卿建武初拜侍御史遷尚書令蹇蹇多直
無所屈撓隴蜀未平上嘗欲近出剛止不聽剛以頭軻

乘輿使馬不得前

東觀漢記

獨埋車輪

張綱為侍御史安帝時遣八使按行風俗綱獨埋其車輪於洛陽都亭曰豺狼當道安問狐狸遂奏大將軍梁

冀兄弟

本傳

持節出使

維立為繡衣使者持節分行天下觀覽風俗所至專分

誅賞

橫劍當車

种暲順帝時為侍御史中常侍高梵受勅迎太子不賁
詔書暲橫劍當車曰御史受詔監護太子太子國之儲
副常侍無一尺詔書安知非挾奸邪今日之事有死而
已梵不敢爭

碎首玉階

王義方劾李義府曰碎首玉階庶明臣節

本傳

奏事龍墀

舊制入閣侍御一員在龍墀邊祇候彈奏公事

唐六典

彈劾十罪

劉忠肅公摯為侍御史彈劾蔡確其罪有十又論章惇凶悍輕銳無大臣體皆罷

決斷大獄

庾峻為秘書丞遍觀古今見聞益廣長安大獄久不決

轉為侍御史斷之朝野稱慶

王隱晉書

奏彰截角



劉暉字長昇遷侍御史武庫失火尚書郭彰率百人自衛而不救火暉正色詰之彰怒曰我能截君角也暉勃然曰天子法冠而欲截角乎君何敢恃寵作威福求紙筆奏之彰伏不敢言

晉傳

驚祐膽落

唐敬宗朝夏州節度使李祐入朝違詔進奉侍御溫造彈之祐趨出待罪股戰流汗謂人曰吾夜踰蔡州城擒吳元濟未嘗心動今日膽落溫御史矣

溫造傳

爭濮王禮

范忠宣公純仁為侍御史時方議濮安懿王典禮大臣
與從官異論公請如從官議公在臺數言人所難言及
爭濮王禮引詛據經語斥大臣尤切繇是名震天下

言行錄

仲諫省氣

林正惠公大中除侍御史鄧司諫驛以忤旨移將作監
公請曲加優容許復舊職丞相留公丐去公率同僚奏

乞宣諭使安相位遂不果去身居言職而伸諫省之氣
誦丞相之賢他人不敢為也

劾寵錦媚

質肅公唐介為御史張堯佐再除宣徽使介爭之仁宗
諭曰除擬初出中書介遂極言宰相文彥博知益州日
進燈籠錦媚貴妃致位宰相請逐彥博仁宗怒貶介英
州別駕會要晁以道云仁宗貶唐介嶺南遣中使賜介金
又畫其象置之使殿言行錄

論帷幄寵

彭思永字季長名為侍御史極論內降官賞之弊以為
斜封非公朝之事仁宗深然之皇祐祀明堂時張堯佐
以妃族進王守忠以親侍帷幄寵參知政事闕負堯佐
朝暮待命守忠亦求為節度使公獨抗疏極言仁宗震
怒中丞郭勸諫官吳奎皆為上言其忠不宜加罪仁宗
怒解而堯佐守忠之望遂格

言行錄

寫幽州圖

後漢李恂拜侍御史持節使幽州宣布恩澤慰撫北狄
所過者圖寫山川屯田聚落百餘卷悉封奏上肅宗嘉
之

後漢書

陳遼東狀

唐賈言忠為侍御史時有事遼東言忠奉使往支軍糧
及還高宗問以軍事言忠盡具山川地勢且陳遼東可
平之狀高宗大悅

清要好官

唐李素立高祖令授七品清要官所司擬雍州司戶上
曰此官要而不清擬秘書郎上曰此官清而不要遂授
侍御史唐史又唐宣宗欲與韋宙好官拜侍御史職林

和蕃判官

唐竇羣隱居毗陵以節槩聞召為左拾遺遷侍御史入
蕃使判官羣因入對奏曰陛下即位二十年始自草澤
擢臣為拾遺是難其進也今陛下以二十年難進之臣
用為和蕃判官一何易也德宗異其言留為侍御史

分紀

謹厚就職

賈黯除中丞新除侍御史呂誨常彈黯過失遷延引避
黯言嘗薦誨為御史知其方正謹厚一時公言非有嫌
忌願得終與共事誨乃就職通畧

忠義復任

劉忠肅公摯擢侍御史公自熙寧以言去位踰十六年
乃復任言責奸佞刻薄之吏事狀顯著公皆正色彈劾
多所貶黜中外肅然時人以比包希仁呂獻可上察其

忠義誠信可屬重任未幾大用焉

言行錄

舉鞭聳揖

舊御史遭長官於塗皆免帽降乘長官戢轡辭而止焉
乾封中王本立為侍御史意氣頗高塗逢長官端揖而
已自是諸人或降而立或一足至地或側鞍弛鞵輕重
無常開元以來但舉鞭聳揖而已

通典

烘堂不罰

侍御史凡上堂絕言笑有不可忍者雜端大笑則闔座

皆笑謂之烘堂烘堂不罰

脆梨佳味

裏行及試員外為合口椒殿中曰生姜侍御為脆梨漸

入佳味

賈言忠撰
監察本草

貞栢勁節

御史臺侍御史廳前有兩株栢總章中李元同張仁禕
為侍御史所植也杜易簡為之贊云爰有貞栢徙植清

臺麝條霜勁蠶葉風開始逢鵲喜終見烏來

續道
典

鷹鷂豈衆禽

乾封二年韋仁約除御史與公卿相見未嘗行拜禮或
勉之仁約曰鷂鷹鷂豈衆禽之偶奈何設拜以狎之
且耳目之官故當特立乃曰御史銜命出使不能動搖
山岳震攝州縣成曠職耳

鷂視燕雀

唐王志愔為左臺侍御史執法剛正百僚畏憚時人呼
為卓鷂言其顧瞻人吏如鷂之視燕雀也

臺官用稀姓

景祐中有郎吏皮仲容街衢為一輕薄子所戲遽前賀之聞君有臺憲之命仲容立馬媿謝久之徐問何以知之對曰朝廷所制臺官必用稀姓者故以君姓知之爾蓋是時三院御史乃仲簡論程掌禹錫也聞者傳以為笑

臺官言大事

皇祐中侍御史徐宗況奏次年直州長蘆江口建佛刹

時轉運使希當塗之旨上言天長六合城壁皆五代時所築上曰設險雖亦故事然朕方恃德不恃險設或有大寇盜一小邑雖有城池亦不足禦卿為臺官當為朕言國家大事未幾出知潁州

獬豸不識字

則天將不利於王室羅織之徒已興矣時授侯思立為游擊將軍高元禮呼之為侯大曰國家用人不次若言侯大不識字即奏云獬豸獸亦不識字而能觸邪則天

果如其問思立以獬豸對則天大喜三年乃拜左臺侍御史

犬馬不及言

皇祐中侍御史宋禧上言乞宮中養羅江狗以備不虞上曰養兵百萬威制夷狄尚慮不可備不虞卿令宮中養狗無謂也曹穎叔言朝言不及犬馬而禧被黜於是
有宋羅江之號

古今文集

古詩

送孫康叔赴御史府

王介甫

古人喜經綸萬事慙強聒時來上青冥俛仰但一節危
言回丘山聲利盡毫末由來治亂體宿昔心已達肯隨
俗好惡議論輕自決遺風何寥寥夢寢待豪傑天書下
東南趣召赴嚴闕長林晦朝輪高行隱家閨新除酬聞
望宿蘊行施設念非吾忘形此理未易說

律詩

送康叔侍御

王介甫

詔取名郎入憲臺此時方急濟時才聖聰應已虛心待
奸黨寧無側目猜白筆豈知權可畏皂囊還請上親開
信聞讜論能醫國飛報頻隨驛騎來

西亭送蔣侍御還京

岑參

忽聞驄馬至喜見故人來欲語多時別先愁計日回山
河宜晚眺雲霧待君開為報烏臺客須憐白髮催

送裴侍御赴詔入京

岑參

羨他驄馬郎元日謁明光
立處聞天語朝回惹御香
臺寒柏樹綠江暖柳條黃
惜別津亭暮揮戈憶魯陽

送唐介貶英州別駕

李師中

孤忠自許衆不與特立敢言人所難
去國一身輕似葉高名千古重如山
並遊英俊顏何厚未歿奸諛骨已寒
天為吾皇扶社稷肯教夫子不生還

贈錢侍御

李白

繡衣柱史何昂藏
鉄冠白壁橫秋霜
三軍論事多引納

堦前虎豹羅千將

太原贈李寓侍御

楊巨源

路入桑乾塞鴈飛
棗郎年少有光輝
春風走馬三千里
不廢看花惹綉衣

邊上送楊侍御

馬載

獄成冤雪晚雲開
笏角威清塞鴈回
飛將送迎遙避馬
離亭不敢勸金杯

寄西臺李侍御

施肩吾

二千餘里採瓊瓌到處傷心瓦礫堆唯有繡衣周柱史
獨將珠玉掛西臺

寄尉遲侍御

李昭象

我眠青嶂弄澄潭君戴貂蟬白玉參應向謝公樓上望
九華山色在西南

贈喬侍御

陳子昂

漢廷榮巧宦雲閣薄邊功可憐驄馬使白首為誰雄

送何侍御歸朝

杜子美

舟楫諸侯餞車輿使者歸山花相映發水鳥自孤飛春日垂霜鬢天隅把綉衣故人從此去寥落寸心違

治書侍御史

歷代沿革漢宣帝宣室齋居決事令侍御史二人治書侍側後因別置謂之治書侍御史蓋其始也魏置治書執法掌奏劾而治書侍御史掌律令二官俱置晉惟治書侍御史四員太始四年又置黃沙獄治書侍御史一人後并河南遂省黃沙治書侍御史及太康

中又省之宋齊只置一人梁置二人後魏太和八年
為持書侍御史後齊亦置二人隋開皇中有持書侍
御史一人為大夫之貳唐貞元中避高宗諱省之依
前代置御史中丞宋無治書御史之官而侍御史下
又有治書侍御史二人

古今事實

周遷三臺

後漢蔡邕以侍御史遷治書御史又遷尚書三日之間

周遷三臺

意出衆表

劉子翊為持書侍御史每朝廷疑議子翊為之辯析多出衆人意表

典行臺獄

魏王觀明帝幸許昌召觀為治書侍御史典行臺獄時多倉卒喜怒而觀不阿意順旨

持協律令

魏職品令云乘輿臨堂及諸處視事則持書侍御史協律令於階側以備顧問

青囊盛印

何思澄自廷尉遷治書侍御史宋齊已來此職甚輕天監初始重其選車前依尚書二丞給三駟執盛印青囊端笏整容

柳或為持書侍御史時左僕射楊素當塗貴重常以小譴勅送南臺素恃貴重坐柳或自外來於階下端笏整

容謂素曰奉勅理公之罪素遽下或據案而坐立素於朝辨詰事狀素由是懾伏

百寮震慄

榮毗陸知命竝拜持書侍御史在朝儼然正色時齊王頗驕縱暱近小人知命奏劾百寮震慄

百寮敬憚

柳彧為持書侍御史當朝正色為百寮敬憚上嘉其直謂彧曰大丈夫當立名於世無苟容而已賜錢十萬米

百石

服賜其公

游元兼持書侍御史宇文述軍敗帝令元理其獄述時
貴倖勢傾朝廷遣家僮造元有所請屬元不之見他日
數述曰公地屬親賢腹心是寄當咎身責已以勸事君
乃遣人相告欲何所道持之愈急仍以狀劾之帝嘉其
公正於是賜朝服一襲

制出無喜

唐孫伏伽為持書侍御史先被內旨而制未出歸臥其家無喜色頃之吏及門子弟驚白伏伽徐起視之時人稱其有量

不復議讞

頃者廷尉多牆面而苟充茲位治書侍御史不復議讞里語曰縣官漫漫冤死半

謂之南奔

謝幾卿梁天監中自尚書三公郎為治書侍御史舊郎

官轉為此職者謂之南奔幾卿頗失志多陳疾臺事畧不復理

殿中侍御史

歷代沿革魏蘭臺遣御史二人居殿中伺察姦非側陞而坐故曰殿中侍御史晉至北齊皆有隋改為殿內侍御史煬帝省唐武德置殿中侍御史四員正官增二人掌殿廷供奉之儀京畿諸州兵皆隸焉彈舉違失號為副端正班列於閣門之外有離立失列言訾

而不肅則糾罰之其正冬大會則戴黑豸乘馬加飾
文明元年又置殿中裏行宋殿中侍御史二人正七
品掌言事分糾凡朝會及朔望六參官班序元豐八
年詔殿中侍御史兼察事監察御史兼言事元置殿
中侍御史二人每遇侍朝立於龍墀之下專掌朝見
之儀

羣書要語執法殿中俾專議論

曲阜陳師錫制

接武夔龍遙羽

鵷鷺

韋絢傳

詩句峨豸忝儼列

韓愈答張徹

白簡光朝列彤駟出禁中

亮褚

盛府題青索珠章動繡衣

蘇味道

古今事實

廊廟之材

唐張行成少師事劉炫炫曰張子體局方正廊廟材也
補殿中侍御史糾劾不避威權太宗謂房玄齡曰觀古
今用人必因媒介若行成者朕自舉之無先容也

本傳

清廟之器

唐李珣字待價為殿中侍御史宰相韋處厚曰清廟之
器豈搏擊才比除禮部員外郎

同

朝戴黑豸

見前
訟革

遶羽鵷鷺

上官儀位宰相時以雍州司士韋絢為殿中侍御史或
疑非遷儀曰此野人語耳御史供奉赤墀下接武夔龍
遶羽鵷鷺豈雍州判佐比乎

韋絢
傳

鐵面御史

趙清獻公抃召為殿中侍御史彈劾不避權倖京師號
為鐵面御史

骨鯁殿院

杜莘老為御史極言無隱取衆所指如王繼先張去偽
輩悉擊去之及罷去朝士祖道都門以詩文稱述者百
餘人都人至今以為美談雖宿衛武夫府寺賤隸誦說前
朝骨鯁敢言之臣必曰杜殿院云

中興系
年錄

天子御史

欽定四庫全書

古今事文類聚新集
卷十八

七十五

龐莊敏公籍入為殿中侍御史中丞孔道輔謂人曰公之御史多承望要人風旨陰為之用獨龐公天子御史

耳言行錄

諫官御史

見前御史門

見惡能討

宋游道為殿中侍御史臺中語曰見惡能討宋游道南史

治獄無枉

唐崔仁師貞觀初改殿中侍御史青州有男子謀逆有

司捕支黨累填係獄詔仁師按覆止坐魁惡十餘人他
悉原縱大理少卿孫伏伽謂曰原雪者衆誰肯讓死就
決而事變奈何仁師曰治獄主仁恕豈有知枉不申為
身謀哉及勅使覆訊諸囚皆叩頭曰崔公仁恕必無枉
者舉無異辭由是知名

本傳

押鍾鼓樓

唐天成二年御史臺奏每遇入閣日欲依常朝例差殿
中侍御史二員押鍾鼓樓位各級供奉官班出入所冀

共為糾察從之

五代會要

出觀象門

監察御史職知朝堂正門無籍非因奏事不得入至殿
廷在棲鳳闕南望殿中侍御史以上從觀象門出若從

天降

唐會要

內出姓名

治平二年以范純仁為殿中侍御史呂大防為監察御
史裏行近制御史有闕則命翰林學士御史中丞迭舉

二人而上自擇取一人為之至是闕兩員舉者未上內
出純仁大防姓名而命之

實錄

上稱仁勇

紹興末金人謀南牧宦官張去偽陰沮戰議且請避敵
陳俊卿為殿中侍御史請斬之上愕然曰公仁者之勇

楊誠齋集

掌正朝班

殿中侍御史掌殿庭供奉之職正班列於閤門之外糾

離班語不肅者

唐官志

又唐臨初為殿中侍御史韋挺以

朝班不整責之臨曰此小事不足介意

與議大政

張行成字德立為殿中侍御史糾察嚴正嘗侍宴太宗語山東及關中人意有同異行成曰天子四海為家不容以東西為限是示人以隘矣帝稱善自是有大政事

令與議焉

唐本傳

責兩離班

王無競轉殿中侍御史舊例每日更直於殿前正班時
宰相宗楚客楊再思嘗離班偶語無競前曰朝禮至敬
公等大臣不宜輕易以慢常典

職林

請后還政

傳獻簡公堯俞英宗即位遷殿中侍御史皇太后同聽
政上疾平公上疏請太后還政未聽頗聞內侍任守忠
有異語公又上疏太后遂還政而逐守忠等

乞用舊臣

陳正獻公俊卿任殿中侍御史時金人謀南侵舊臣惟
張忠獻在謫居湖湘中外翕然歸之上心益疑公上疏
乞除一近郡以繫人心上大悟明日除兵部侍郎後數
月竟用張公守建康

楊誠齋集

上言正人

趙清獻公抃字閱道除殿中侍御史先是呂溱出守徐
蔡襄守泉州奎守壽韓絳守河陽歐陽脩乞蔡賈黯乞
荆南公即上言近日正人賢如脩輩無幾今皆欲請郡

者以不能諂事權要傷之者衆矣脩等由此不去一時

名臣賴之以安

言行錄

耻為呈身

皇祐中詔中丞孫抃舉御史抃舉吳中復或曰公平生
不識中復何由知之抃曰昔人耻為呈身御史今我豈
求識面臺官遂除殿中侍御史

竝為言事

慶歷五年殿中侍御史梅摯監察御史李京竝為言事

御史唐制御史不專言職故天禧始置言事御史六員
其後久不除至是始除之會要

辛辣不患

殿中為蘿蔔亦曰生薑雖辣而不為患賈言忠本章

強禦不畏

宋紹興三十一年杜莘老為殿中侍御史入見上曰知
卿不畏強禦故有此授自是用卿矣系年錄

彈一十八章

呂誨字獻可端之孫也召為殿中侍御史彈劾無所避
公主夜扣禁門劾奏公主閤官者竄逐之彈樞密使宋
庠不稱具瞻之望陳昇之為樞密副使誨與唐介趙抃
論昇之交結中人不可大用章十八上卒與昇之俱罷
劾罷監司

殿中侍御史常同為御史不數月劾罷監司不才者二
十有三人中外聳然

中興系
年錄

論宰相回佞

何剡字聖從為監察御史遷殿中權御史知雜上疏論
宰相陳執中寡學術參知政事丁度輕脫夏竦回佞皆
不協人望親從官謀為不軌竊發寢殿而連日賊未得
內臣楊懷敏倚夏竦冀免失職之過剡劾其罪章累上
懷敏遂斥去

事畧

言大臣奸邪

汪徹字明遠為殿中侍御史上言昔慶厯初京師一日
無雲而雷仁宗以天變如此由夏竦奸邪亟命黜之前

日無雲而雷人情駭異其變蓋在大臣

言行錄

十年將相

河東缺漕使章郇公言文彥博者有稱呂許公者曰可
召來面詢之召至堂上許公不交一談但睥睨不已郇
公因言河東事曰彥博鄉里無所不知及退許公歎曰
此大有福人何所任用不可遂自殿中侍御史差委不
出十年出將入相

言行錄

四其御史

郭弘霸為左臺殿中侍御史則天召見弘霸自陳忠鯁
云往年征徐敬業臣願抽其筋食其肉飲其血絕其髓
則天悅故拜為左臺侍御史

古今文集

雜著

辭免殿中侍御史申省狀

洪咨夔

渙敬異渥震惕危衷竊惟柱後惠文之官尤重殿中執
法之選職修明於國是用整肅於朝綱粵從琴瑟之更

張類多矛盾之竝立邊帥之或和或戰正值兩強廷臣之孰是孰非必求一勝決治亂安危之勢觀抑揚進退之機疇副臺端盡論時望如某者誤蒙蒐拔濫廁糾繩謂車當主於可行何人心之擾擾而舟必免於偏重乃王道之平平方包不稱之羞忽冒非常之擢周旋烏府供奉赤墀純仁之內出姓名固誓圖於美報唐介之願解言職正恐負於隆知欲望朝廷特賜敷奏光摩日月別求夔龍接武之英威厲風霜庶折豺狼當道之氣

古詩

入奏行

杜甫

竇侍御驥之子鳳之雛年未三十忠義俱肯鯁絕代無
炯如一段清水出萬壑置在迎風寒露之玉壺蔗漿歸
厨金盃凍洗滌煩熱足以寧君軀政用踈通合典則威
聯豪貴耽文儒兵革未息人未蘇天子亦念西南隅吐
蕃憑陵氣頗麤竇氏檢察應時須運糧繩橋壯士喜斬
木火井窮猿呼八州刺史思一戰三城守邊却可圖此

行入奏計未小密奉聖旨恩宜殊綉衣春當霄漢立綵服日向庭闈趨省郎京尹必俯拾江花未落還成都肯訪浣花老翁無為君酤酒滿眼酤與奴白飯馬青芻

監察御史

歷代沿革秦有監御史掌監部漢惠帝六年相國奏遣御史監二部監者二歲更常以十一月奏事十二月還監其後州置監御史宣帝遣御史察計簿不實者監察之名兼取於此東晉武帝太元中置檢校御史

知行馬外事

沈約宋書曰古司隸校尉知行馬外事
晉江左罷司隸置檢校專掌行馬外事

晉書曰初以
昆之為此官

吳宋齊梁陳並置後魏北齊復置十二

人隋改檢校御史為監察御史蓋取秦監御史之義

以名之凡十二人煬帝增置十六人唐武德初置八

人貞觀二十二年加二人又置監察御史裏行以馬

周為之自此便以為官之名宋御史多出外任風憲

之職以他官領之太平興國三年詔本司自薦屬官

俾正名舉職天禧元年詔別置御史六員不兼他職

月須一員奏事有急務聽非時入對以殿中丞劉平
為監察御史用新詔也嘉禧四年中丞韓絳請置裏
行從之熙寧三年除秀州軍事推官李定權監察御
史裏行用選人為御史自定始也宋敏求繳詞頭云
去歲驟用京官今又幕職官便昇朝著峻處糾繩之
地臣恐未厭衆議五年詔秘書殿中內侍省不隸六
察如有違慢委言事御史彈奏七年大正官名以言
事官為殿中侍御史六察官為監察御史掌吏戶禮

兵刑工之事在京百司而察其繆誤八年詔監察御史
兼言事殿中侍御史兼察事徽宗時如壁雍大成
府等學太官局翰林儀鸞司東西上閣門客省引進
四方館皆不隸臺察崇寧間大臣欲其便已而南臺
御史亦有不言事者自大觀臣僚申請而殿中六尚
壁雍大成府等學太官局翰林儀鸞司皆隸六察自
余應求有言而東西上閣門客省引進四方館復隸
御史自胡舜陟申請而本臺始增入御史言事之文

乾道二年詔自今非曾經兩任縣令不得除監察御史著為條令元御史臺置監察御史又置曲事

羣書要語繡衣始拜珥筆升朝臺閣以之生風豪貴由

之斂手

陳子昂集

冠惠文冠察行馬外事

夢得集

俾冠惠文往

專刺督

曲阜傳輯制

古今事實

臺有三院

唐御史臺有三院三曰察院監察御史隸焉

院有六察

唐監察御史有六其一察官人善惡其二察戶口流散
帳籍隱沒賦役不均其三察農桑不勤倉廩耗減其四
察妖滑賊盜不事生業為私蠹害其五察德行孝悌茂
材異等藏器晦迹應時用者其六察黠吏豪宗兼并縱
暴負弱冤苦不能自申者

亦曰蘭臺

晉孝武置檢校御史掌行馬外事亦蘭臺之職

謂之松廳

察院諸廳各有地名會昌初監察御史鄭路所葺禮察廳謂之松廳南有古松也

張膽報國

韋思謙為監察劾褚遂良及再相出之或弔之荅曰大丈夫當正色之地必明目張膽以報國恩終不能為碌碌之臣保妻子耳

隨仗入閣

欽定四庫全書

唐監察御史職知朝堂正門無籍非因奏事不得入至
殿庭在棲鳳閣南視殿中侍御史以上從觀象門出若
從天降至開元七年勅竝隨仗入閣

決獄乃雨

顏真卿字清臣為監察御史五原有冤獄久不決真卿
至辨之天方旱獄決乃雨郡人呼為御史雨

受命息風

唐陸方元為監察御史則天使安輯嶺外將涉風濤甚

狂舟人不敢舉帆方元曰我受命無私神豈害我遽命
濟而風息

夜加二階

韓思彥為監察御史昌言當世得失高宗夜召加二階

時號四其

郭弘霸自陳討徐敬業臣誓抽其筋食其肉飲其血絕
其髓武后大悅授監察御史時號四其御史

劾京兆尹

德宗即位之初侍御史朱敖請復舊制置朱衣豸冠於
內廊有犯者御史則以彈舉上許之建中元年監察御
史張著冠豸冠劾京兆尹蕪御史中丞嚴郢於紫微殿
削郢御史中丞而著賜緋魚袋自是日懸衣冠于宣政
之左廊

劾節度使

元稹拜監察按獄東川因劾奏節度使嚴礪違詔過賦
凡十餘年

劾背闕坐

李勉拜監察御史屬朝廷右武勲臣恃寵多不知禮大將管崇嗣於行在朝堂背闕而坐勉劾之肅宗歎曰吾有李勉始知朝廷尊矣

本傳

諫犯法死

唐李素立武德初為監察御史時有犯法不至死高祖特令殺而素立諫曰三尺之法與天下共之一法動搖則無所措手足臣忝法司不敢奉旨帝乃從之

分紀

諫市舶利

元宗有賈人言市舶利上命監察御史楊範臣往求之
範臣奏曰御史天子耳目之官必有軍國大事臣雖冒
觸炎瘴死不敢辭此特賈人眩惑求媚無益聖德上慰
諭而罷

論樂工爵

馬周客中郎將常何家為何條二十餘事皆當世所切
太宗恠問何何曰此非臣所能家客教臣言之客忠孝

人也帝即召之未至遣使四輩趣及見與語大悅拜監察御史乃上疏論王長通白明達本樂工今超受高爵與外廷朝會鳴玉曳履臣竊耻之帝善其言

本傳

不樂檢局

柳渾召拜監察御史臺僚以儀矩相繩而放曠不樂檢局乃求補外宰相惜其才

唐本傳

不樂滋味

韋表微擢進士授監察御史不樂曰爵祿譬滋味也人

皆欲之吾年五十拭鏡撈白冒遊少年間取一班一級
不見其味也將為松菊主人不愧陶淵明云

上林棲鳥

見詩話

中灘鵝鵝

河南伊闕縣前每僚佐有入臺者即水中灘出石礫金
砂清澈可愛牛僧孺為尉一日報灘出縣僚共觀之有
老吏曰此必分司御史若是西臺當有一雙鵝鵝僧孺
因舉杯祝曰既成有灘何惜鵝鵝言訖一雙鵝鵝飛下

灘中不旬日僧孺拜察院

劇談

兄弟竝居

楊假楊收竝遺直之子假自浙西觀察判官入為監察御史收亦自西川入為監察御史兄弟竝居憲府特為新例

兄弟代為

韋貫之始為監察御史舉其弟纁自代及為右補缺纁代為御史議者不謂之私

並本傳

戢爭新法

張戢字天祺除監察御史爭新法章數十上最後言今大惡未去橫斂未除不正之司尚存無名之使方擾又詣中書爭之王安石以扇掩面而笑戢曰戢之狂直宜為參政所笑天下之人笑參政亦不少矣

淵源錄

詠裂麻制

鞠詠為監察御史言錢惟演與丁謂交結不赴亳州圖入相謂人曰若相惟演當取麻制裂之

國史本傳

趣裝就職

劉忠肅公摯除監察御史欣然就職語家人曰趣裝無

為安居計未及陞對首上疏論事

劉元成集

劾奏犯令

劉庠字希道除監察御史襄行奉震庫失盜庠劾奏近
侍領皇城司者初禁銷金李珣犯令庠言法行當自貴
近始英宗曰朕豈私一李珣邪珣乃仁宗外家若行之

天下謂何

同上

乞治內降

傅堯俞為監察御史裏行朱晦子穎士求內降監汭口鎮而都水監復薦之公言密院既不治穎士求內降罪而都水又安知其可任而舉之上下相結迭相阿徇其盜名器將不但一汭口鎮而已乃罷穎士權倖憚焉言行

錄

乞罷常平

張戢召為監察御史裏行每進對必陳古道引大體不

舉苛細論王安石變法非是乞罷條例司及追還常平

使者

東都
事畧

諫造宮殿

唐李善感為監察御史裏行永淳初造奉天宮於嵩陽
縣又於藍田造萬金宮善感極諫時人以此稱之

分紀

諫出逸遊

楊虞卿為監察穆宗初立多出逸遊荒恣上疏切諫帝
令宰臣云虞卿所上議切諫可覽後宰臣令狐楚因以

納諫為賀

嘆為得體

明道先生為御史時權裏行神宗召對問所以為御史對曰使臣拾遺補缺裨贊朝廷則可使臣掇拾臣下短長以沽直名則不能神宗歎賞以為得御史體

期以大用

明道先生權監察御史裏行神宗素知先生從容咨訪比二三見遂期以大用每將退必曰頻求對來欲常相

見爾

程伊川文集

言紀綱五事

呂大防字微仲除監察御史裏行首言紀綱賞罰之際未厭四方之望者有五

陳利病十事

彭汝礪字器資權監察御史裏行公在言職非唐虞三代不論初對上十事陳得失利病多人所難言者言行錄

極論宮市

韓愈操守堅正鯁言無所忌遷監察御史上疏極論官市德宗怒貶山陽令

極論權嬖

裴度遷監察御史論權嬖梗切

本傳

歷圉按狀

趙涓永泰初為監察御史時禁中失火與東宮稍近代宗深疑之涓周歷孺圉按據迹狀乃上直中官遺火所致也德宗時在東宮常感涓涓究理詳細及刺衢州年

考既深與韓滉不相得滉奏免洵官德宗見其名謂宰
臣曰豈非永泰初御史趙洵乎對曰然即拜尚書左丞
卷簾與語

張嘉貞長安中侍御史張循憲為河東採訪使薦嘉貞
材堪憲官請以已之官秩授之則天召見垂簾與之言
嘉貞奏曰以臣草茅而得入謁九重是千載一遇咫尺
之間如隔雲霧竟不覩日月恐臣之道有所未盡則天
遽令卷簾與語大悅擢拜監察御史

陳絕害屏邪

王巖叟召為監察御史上疏極陳時事之弊以謂不絕害源百姓無由樂生不屏羣邪太平終是難致

言正心窒欲

明道先生顯權監察御史裏行前後進說甚多要以正心窒欲求賢育材為先嘗言人主當防未萌之欲神宗俯身拱手曰當為卿戒之

號夜叉鬼

唐監察御史李全交專以酷虐為業臺中號為鬼面夜叉

為開口椒

監察為開口椒毒微歇裏行及試自外為合口椒最毒

古今文集

雜著

辭免察官奏狀

周必大

自天有命躋地無容伏念臣奮自寒鄉最為冗士獻芻

言於召試之日蒙睿獎於面對之初久竝英游莫仲薄
效不圖簡記更誤選掄分直棲鳳之南察事行馬之外
臣猶自駭人謂斯何敢陳量已之言祈寢出綸之渥俾
安舊次免累聖知

辭免除監察御史

洪咨夔

恩榮自天兢懼無地竊以公議國家之命脉人材朝廷
之精神方其未出則望之如景星如鳳凰及其既用則
倚之為屈軼為獬豸元祐王岩叟之召明道范仲淹之

來緊時所推皆此其選皇上養晦於十年之久天下望
治於踰月之間轉機括以作新厲措紳而更始紀綱所
繫風憲可輕如某者積困窮途甫還舊署舉動不足以
窺王猷之遠議論不足以扶國是之公首玷親除必速
官謗况未常作縣難以入臺欲望朝廷特賜敷奏收非
常之誤渥畀有望之時髦庶使危蹤少安微分

論巡察風俗疏

李嶠

陛下創置右臺分巡天下察吏人善惡觀風俗得失斯

政途之綱紀禮法之準繩無以加也然猶有未折衷者
臣請試論之夫禁網尚疎法令宜簡簡則法易行而不
煩雜疎則所羅廣而無苛碎竊見垂拱二年諸道巡察
使所奏科目凡有四十四件至於別準格勅令察訪者
又有三十餘條而巡察使率是三月已後出都十一月
終奏事時限迫促簿書填委晝夜奔逐以赴限期而每
道所察文武官多至二千餘人少者一千已下皆須品
量才行褒貶得失欲令曲盡能行則皆不暇此非敢情

於職而慢於官也實才有限而力不及耳臣望量其功
程與其節制使器周於用力濟於時然後進退可以責
成得失可以精覈矣又曰今之所察但準漢之六條推
而廣之則無不包矣無為多張科目空費簿書且朝廷
萬務非無事也機事之動恒在四方是則冠蓋相望郵
驛繼踵今巡使既出其外州之事悉當委之則傳驛太
減矣然則御史之職故不可得聞自是分州統理無由
濟其繁務請小大相兼率十州置御史一人以周年為

限使其親至屬縣或入閭里督察奸訛觀採風俗然後
可以求其實效課其成功若此法果行必大裨政化耳
御史出持霜簡入奏天闕其於勵已自修奉職存憲比
於他吏可相百也若其暗劾奸邪發摘欺隱比於他吏
可相十也陛下試用臣言妙擇賢能委之心膂假溫言
以制之陳賞罰以勸之則莫不盡力而効死矣何政事
之不理何禁令之不行何妖孽之敢興哉

王義方彈李義府疏

義府擅殺寺丞陛下雖已釋放臣不應更有鞫劾然天子置三公九卿二十七大夫八十一元士本欲水火既濟鹽梅相成然後庶績咸熙風雨交泰則知人主不得獨謂皆由聖旨昔唐堯至聖失之於四凶漢祖深仁失之於陳豨光武聰明寬恕失之於逢萌魏武勇畧失之於張邈此竝英雄之主莫不失之於前得之於後陛下繼聖撫有萬邦蠻貊夷落猶懼刑網况輦轂咫尺奸臣肆虐殺一六品寺丞是使忠臣抗憤義士扼腕縱令正

義自取絞縊此事彌不可容便是畏義府之權勢能殺身以滅口此則殺生之威上非主出賞罰之柄下移奸佞臣聞履霜堅冰積小成大請乞重勘當畢正義致死之由雪冤氣於幽泉誅奸臣於白日對仗叱義府不退義方三叱上既無言義府趨出義方乃讀彈文曰義府善柔成性佞媚為心昔事馬周分桃見寵後交劉洎割袖承恩生其羽翼長其光價因緣際會遂階通達不能盡忠端節對敬王休策蹇勵駕祇奉皇眷而反憑附城

社敝虧日月請託公行交遊羣小貪治容之好原有罪
之淳于恐漏泄其謀殞無辜之正義雖挾山超海之力
望此尤輕回天轉日之威方斯更劣此如可恕孰不可
容金風戒節玉露啓途霜簡與秋典共清忠臣與鷹鷂
竝擊請除君側少答鴻私碎首玉階庶明臣節伏請付
法推斷以申典憲

律詩

送沈興宗察院出湖南

王介甫

諫書平日皂囊中朝路爭看一馬驄漢節旣曾衝海霧
楚帆聊復借湖風皇華命使今為重直道酌君遠亦同
投老承明無補助得為湘守即隨公

詩話

詠院中叢竹

唐呂太一拜監察御史裏行自負才華而不即真乃詠
院中叢竹以寄意焉曰濯濯堂軒竹青青耐歲寒心真
徒見賞籜小未成竿

詠棲鳥

李太亮劉洎奏李義府召見試令詠棲鳥立成詩曰日
裏颺朝彩琴中伴夜啼上林多少樹不借一枝棲太宗
賞之曰我將全樹借汝豈惟一枝拜監察御史

唐史

檢法

歷代沿革漢隋有御史臺主簿至宋熙寧十一年改主
簿作檢法官各一員係長貳同舉京官充元豐四年
罷

見宣和二年
御史臺申請

六年復置各一員元祐三年改檢法

官為主簿紹聖三年因董敦逸奏請復置掌檢詳法律續會要四朝志又熊氏職畧云國初沿唐制御史臺有權直官元豐官制行始罷權直而置檢法按四朝志權直罷於改官制之時而檢元御史臺亦有檢法法之置曰在熙寧十年當攷

古今事實

鈎考簿書

宋御史臺其屬有檢詳法律主簿鈎考簿書堂領錢穀

各一人從八品

神宗正史
職官志

分治職事

元豐六年九月中丞黃履言本臺有主簿兼檢法官二員乞復置分治職事招置主簿并檢法官一員

會要

參預定刑

中丞黃復奏本臺主簿檢法官係分掌班亦參預定刑

所領職事與他司不同

同上

點檢文字

御史臺主簿掌受事發辰勾檢稽失兼簿書錢穀之事
元豐二年李定請增置一員點校六按文字元祐元年

大理寺左斷刑架閣庫專委主簿主管

續會要

登聞檢院

歷代沿革唐天寶九載改理匭使為獻納使後又改知

匭使宋雍熙元年改匭為檢

東延恩曰崇仁南招諫曰思諫西申寃曰申明

北通玄曰招賢

景德四年改為登聞檢院命樞密直學士張

詠判

仍差內品監門不得闕預公事

隸諫議大夫掌受文武官及士

民章奏表疏凡言朝政得失公私利害軍期機密陳

乞恩賞理雪寃濫又奇方異術皆受以通達凡進狀

者先鼓院若為所抑則詣檢院

外有理檢使今不置使於淳化三年置理

檢院於乾元門之西北廊以知制誥錢若水領之復唐制也至道三年廢天聖七年上因讀唐史見匭函

達下民冤枉之事乃謂左右曰天下九州之大豈無冤枉之人若至京師檢院鼓院理雪者必是州縣吏提點刑獄轉運使不能理雪又若不為申理則赤子無告矣乃置匭函仍專命御史中丞為理檢使以分

紀中興之初因舊制置局于闕門之前

舊在宣德門外仗隸門下

省南渡以來創治所於和寧門之下紹興戊寅復承

平之制移置居雙闕之左元置登聞檢院又置同知

一員

羣書要語皇帝清問下民鰥寡有辭于苗書乃立掌匭

之司設通事之吏職在達下情于上天敝王言于有位

李華含
光殿賦

古今事實

受四方書

唐武后垂拱二年有魚保宗者上書請置匭以受四方

之書乃鑄匭

百官志

置四區匭

武后置匭四區東曰延恩有言養人觀農之事及賦頌
求官爵者投之南曰招諫有言時政得失及直言正諫
者投之西曰伸冤有披陳冤抑者投之北曰通玄有言
玄象非常災變及隱秘者投之以正諫大夫補闕拾遺
一人充使知匭事

唐書

論治體

宋監登聞檢院呂祉字安老特轉一官守右正言祉上
疏論致治之體疏入召對復進三策上嘉納之遂有是

命

廣言路

紹興十年臣寮奏疏云國家置檢鼓院所以典勑廣言路通下情也

置理檢使

咸平改登聞院曰登聞檢院鼓司曰登聞鼓院自是匭
匭遂廢天聖間復於檢院鼓院各以匭函為檢匣凡言
大事朝政闕失或訴冤未辨者悉令檢匣以進即言涉

奇邪無得通聞置檢理使領之

隆平集

上東封書

田錫字表聖入判登聞檢院因壽寧節獻詩二十韻太

宗和賜又上東封書翼日命知制誥

真宗實錄

古今文集

律詩

贈獻納使田舍人

杜甫

獻納司存雨露邊地分清切任才賢舍人退食收封事

欽定四庫全書

古今事文類聚新集
卷十八

一百四

宮女開並近御筵

登聞鼓院

歷代沿革宋文帝元嘉九年魏主詔闕左懸登聞鼓以達寃人南梁武帝天監元年詔於公府謗木肺石傍各置一函百姓已窮九重莫達若欲自申投肺石函唐大曆十四年詔天下寃滯於朝堂受詞推決尚未盡者聽撾登聞鼓宋曰鼓司以內臣掌之鼓在宣德門南街北廊至道三年命太子中舍王濟勾當鼓司

用朝臣勾當自此始景德四年詔改為登聞鼓院掌
諸上封而進之以達萬人之情隸諫正言凡文武臣
僚開門無例通進文字竝先經登聞鼓院進狀未經
鼓院者檢院不得收接建炎元年因舊制置局于闕
門之前高宗即位於南京召李綱為宰相綱奏曰人
主莫大於蕙聽廣視使下情得以上通今艱
難之際四方休戚利害日欲上聞而士民之愿效其
智慮者尤多而檢鼓院猶未置恐非所以通下情而
急先務也遂置登聞檢三年專隸諫院元亦置登聞
鼓院掌奏告御史臺登聞檢院理斷不當之事

羣書要語九重嚴邃非叫聞之可聞萬邦遐曠因表疏

而方達其有寃未申投匭

唐大詔令

古者朝有誹謗之木敢

諫之鼓所以通治道而來諫者也

漢書

萬邦之事無隔於

九重獻替之謀不遺於聽覽

唐大詔令

古今事實

建登聞鼓

太宗苟求諫諍俯察謳謠廣延不諱之書建登聞之鼓
于時在朝無闕政四海無疲人不遺聽覽其擊登聞鼓

者委金吾將軍收進不得輒有傷損亦不須令人遮擁
禁止其理匭使但任投匭人移表狀於匭中依常進來
不須留副本併妄有止遏

撾登聞鼓

唐大曆十四年詔天下冤滯於朝堂受詞推決尚未盡
者聽撾登聞鼓

以懸闕左

宋元嘉九年魏主詔闕左懸登聞鼓以達冤人

通鑑

以代謗木

寶應元年制下自黎蒸上及公卿竝須投匭論及時政得失仰左中正清白官一人知匭務知招其直言以代謗之木其匭朝夕出入

續通典

東坡遠器

蘇軾字子瞻判登聞鼓院英宗在藩聞軾名欲以唐故事召入翰林宰相韓琦曰蘇軾之才遠大之器天下之士莫不畏慕降伏皆欲其進用然不若朝廷培養之而

後用也及試一論復入三等得直史館

伊川再辭

程伊川差兼判登聞鼓院先生引前說且言入談道德

出領詞訟非用人體再辭不受

文集

故求間局

呂申公公著謚正獻差判登聞鼓院公研精講學無進趨之意嘗與王介甫相對而嘆曰今天下雖小康然堯舜之道知其不可復行以故求間局將以遂其志

言行錄

耻自引去

李椿字壽翁監登聞鼓院淵覲寵方盛同舍人走其門

公耻之自去

晦庵集

預賜錦袍

景德二年改鼓司為登聞鼓院即命周起謚安惠判鼓院會十月賜近臣錦袍特預之

仁宗實錄

改為檢匣

見前聞檢院同

古今事文類聚新集卷十八